

思伯子堂詩集

思伯子堂詩集卷十七

建甯張際亮亨甫

元日口號

壬辰

閭闔初傳萬戶鐘
冕旒靜肅九天風
東西侯伯陳周玉
左右賢王拜漢宮
雪霽甘泉將射雁
春回渭水欲飛熊
小臣敢奏相如賦
聖主方繩下武功

卽事

去鳥忽已遠
行人在夕陽
沈沈寒氣白
漠漠映天長
旅思先花發
詩心入石忘
蕭寥崖谷裏
因見古時狂

游石經山詩

初四日立春偶行山下得蹇驢遂至此山日夕而歸慨然有述

太行天下脊萬馬奔幽州茲行若怒驥渴飲渾河流
日照層冰河上風颼颼駱駝千百匹晝踏河冰游飄風
更四起大地塵沙浮蒼然宮闕壯積氣不可收雲端北
海暮鳥外中原秋誰知俯仰閒四序忽已周旦晚視一
世人生復何求

羣峰立積雪皓倚天崢嶸西蟠太白氣迸奪陰山精東
迴遼海上散爲風沙聲榆塞何峨峨一險分幽營落日
照居庸倒影開神京古來射虎將多在右北平人代飛
鳥疾客子騎驢行寒飲牛酥酒飢餐羊酪羹茫茫四海

春無地容躬耕感此形勝佳浩然羈旅情

昨夜東風來蕭蕭沙雁發登高眺四遠川原互出沒埃
塵暗齊魯瘴海斷甌越豈無異鄉花何似舊林樾去日
亦已逝來日未可忽夕光映東南天青但如髮

野鶻崖浮圖忽落茲山巔山洞七十二構架自何年秦
昌天啟日斷碑餘錢鑄石霾亡國氣地坼陰燐煙萬姓
竭脂膏流爲澗底泉泉荒飲我騎日夕風蕭然人閒廢
興迹何必觀桑田但撫懸崖松歲序亦屢遷

冬寒昨已消春晴今欲始去歲泊吳城清晨望積水嵯
峨匡廬雪影落明湖裏天迴九江白日照五峯紫高歌

思作千言詩集卷十一
倚長劒極目見千里思逐鯢鵬游浩挾魚龍起安知策
蹇驢同日復在此出門沙撲面下山風貫耳冰堅塞道
路冉冉牛羊尾此時城中人安車騎從美或施錦步障
歌舞少年子生命那得齊丈夫困有以蹉跎山水閒未
是平生恥

初九日早起卽興有述

積陰返厚地氣散升春陽浩如江海曠四遠空茫茫東
村暗曉路叱犢聲何長時至萬物知野有耕農忙依依
門前樹忽忽眾鳥翔厓谷近蔽翳一囀餘清揚慨想洗
耳土豈曰輕陶唐俯仰宇宙閒貧賤意亦忘行觀旦暮

理坐覺飛潛良掩關讀我書非舍復奚藏

古意

君在常山南我在常山北蘿月照松門似君昔顏色別
來今六載斷溝不到海濁泥望清塵路旁肯相待婀娜
楊柳枝三月作絮飛朝飛逐落花夕飛入羅帷好語致
風伯莫便曉夜吹兩劒匣中語一桐爨下泣但見蒼天
高那知青春急剖心作明鏡照我不照君千尺紫絲帶
無力繫浮雲袖裏雙素書欲寄問空虛夜夢在燈前愁
病宛有餘喔喔聞晨雞君東我復西君如啟明小我似
長庚低腸斷莫復道相思以終老

是夜卽興復述

獨坐聞天風開門見山月松明雲嶺空下照石壁雪谷口霧蒼茫東飛一鳥沒飄葉如行人蕭蕭中夜發

翠微山望圓明園作

北京啟長安西山峙終南昔聞翠微寺

唐南山有此寺

今瞻雲

臥庵

寶珠洞有高宗額曰雲臥

御榻

左帶來青軒

在香港

下周玉泉

潭流波昆池匯倒影方壺涵瑤窗明鏡開金梁綵虹銜靈禽集仙樹夕月餘朝嵐

皇情旣已暢庶類居然咸優游侍從筆駿奔元老驂氣色方春滿膏澤長秋覃遐思狗監薦獨使馬卿懸

十五夜口號

依依朝來雪宛宛夜來月月照游子衣雪深何處歸前
年螺女水去歲皖公山看徧天涯月千山萬水閒

十七夜偶憶去年今日抵桐城慨然口號

信矣東西南北人舊游處處迹空陳猶思絕塞生馳馬
不道長江涸困鱗臥病薜蘿仍見月經年楊柳欲愁春
博陵亦是登臨地自古飄零乞食頻

亡丑此日在博野縣署

去歲落解後禮門明府遣僕迎余謝不往歲暮復
得其手書因前詩博陵句振觸不已述懷卻寄

四海猶餘長者知古聞國士感微時卽看天地風雲滿

正恐關河歲月馳

聖祖躬耕遺畝在去年征稅老農宜

博野邑小賦重連歲征輸不足明府

幾被吏議昨書來言去歲大熟通賦皆報解歷任所未有也

春來可是桃花徧能惠

閭閻卽我私

二十四日對雪漫作

朔雲千里暮寒浮誰侈銷金帳下游明月不來歌舞夜
空山如見古今秋去年早潦茲宜麥昨夢交親此繫舟
遙祝北堂春更健心歸東越我何求

雪霽

簷際瀟瀟雨開門日在天白餘孤鳥外青出亂山前多

病閒過化新晴暖引眠極知南土樂春水正開田

斜日

斜日高峰後餘光曠野前風林縈紫邏雪壁落鳥隄霽
欲生新水寒猶似舊年數家茅屋在黯絕不成煙

增樹齋太史

君二月八日四十生朝余在山中未
置酒杯期勉之誠寄以韻語時初四

日

聖代御宇宙於茲二百年愧非龍虎士不附風雲先公
卿亦袞袞人百罕一傳國史綴姓名有若案牘填常觀
三代後智者能因天韓馬固磊落豈必稷契肩管葛自
有時賈生誰哀憐憶昔望隆中慷慨居園田太息天下

事其言若湧泉長老喜且嘆謂楫利濟川滔滔海水流
自溺終茫然功名既不就獨使歲月遷勞皇念速作疾
苦紛相纏徒懷萬古心何補十載愆相逢年少子顧盼
恆輕翩心欲勸彼學自反涕泗漣才人如春華顏色豈
得專風雨不自庇墮落隨朝煙妙舞雜粉黛豔歌陳箏
絃賓客競酒食眺覽勞車船是皆才之賊旦夕爭因緣
壯盛足意氣衰病悔已過去日不可追來日蹶且顛侵
尋白日速坐視歸虞淵古來遭逢盛猶恐勢不延所以
惜寸陰家室屏流連吾儕竟何如俯仰慙安便白髮未
肯衰老至身無權後日誰能恃略可觀其前記我始交

君年如月下弦三十忽已過困否嗟屯遘君雖處豐亨
四十弧重懸生平懷抱志寂寞對簡編文豹必隱霧神
魚必畏筌賢者處必靜爲學必惕乾進可活九州退匪
陋一塵勳業與文章自古孰兩全得失本運會蹉跎乃
棄捐尋常擁節鉞似執爨子轡襪線復斗筭補苴矜淺
淺非君夙所慕非我意所賢况君久有孫有父髮猶元
有婦亦如賓昔聞迴文篇門生見五世拜跽勤周旋念
此亦足快可以酬於筵醉吟城南句勛汝符郎度吾方
類孟郊未欲寒蟲蛭周南滯太史每感述窮蟬長嘯草
莽閑蒿艾蔽蘭茝霄漢露霜多歲晚識節堅

僧

僧從天台來言訪五臺山問余香界寺爲指孤雲閒行
隨夕鳥遠夜聞鐘聲閒未知華頂月獨宿誰掩關南北
豈不勞宗教邈莫攀風廊滅明燭向曉應思還

偶至長安寺游憩夕歸有述

吾廬藏輿阻朝夕見城中下嶺越荒礪憑郊觀遠空草
低鷹隼地塵起駱駝風不盡蒼茫外浮圖影數重
孟冬爲別處再至已中春一里徑非遠諸峯晴更新夕
陽高下寺飛鳥過來人坐嘯當前嶺松風答響頻
山半牛羊下村童谷口回不知樵牧樂日暮卽歸來偶

諸石留坐呼家門對開此時亭上望客倦意悠哉

春至因多態心閒轉覺孤巖崖背巉峭田野面蕭疏天
白人煙末苔青僧骨餘可憐苦樹子歲歲熟何如

前朝宦寺墓結構半茲山珠玉泉中怨煙霞死後閒何

須話興廢但覺盡凋殘王府村村是頽垣落日看寺外村有

金王府許王府諸名
皆前朝豪貴墓園也

吸茗一蕭散浮雲多古今興闕卽歸路氣爽俯高林月
出經聲靜山迴夜色深下方涉已遠獨眺儻相尋

雪後月夜覽近人詩文慨然有作

今朝風雪滿山中人迹絕獨坐遂已夕月照竹上雪引

眺對遙空羣秀可攬結春寒氣逾清夜靜理斯悅賢聖
邈然遠昧濁安取潔余豈不好名良恐遂蕩決多難負
夙心幽芳凜凜節雖慙植世志庶勉汲古列百年一旦
暮孤軌誰同轍石林映燈火卽目有深闊

聞雁

天涯獨客久不歸晝思夜夢如無依豈如磧雁有常候
秋南春北來去飛一行乍見落日遠數聲或度重雲遲
去年江淮水淹溢十室九戶民苦飢心知稻粱謀不易
嗟爾何處蘆花肥幸因地暖避冰雪得返朔塞鳴母悲
東風二月花發時走馬亦有游俠兒酒盧飲罷出門笑

弓箭在腰何所之

偶至香界寺僧有自福山來者與話海市漫作

昔聞東坡賦海市自笑無分官登州寺僧州人乃見慣
爲言變幻隨雲浮今來春風扇蛟蜃正有空影懸重樓
須臾萬象在咫尺大千世界何所求且看曉日照宮闈
亦如蛟室開滄洲秦人癡絕信大藥回首不見東海流
一椽茅屋足清嘯放眼身外真泡漚空山二月禽對語
下窺人馬行虛溝風塵自古役壯士但取卿相酬恩仇
馬上來者各有爲豈知閒話西巖幽吾思之不足棲隱
石田耕與麋鹿游東坡往矣此境在誰弄倒景淩丹邱

去山

始我來茲山擬卜一歲居今茲五月去問去意何如一
僕與兩僧晝夜爭呼盧日高喚之起百喚乃一趨草草
治一飯不復問其餘平生性褊急強恕成寬舒寬失下
乃縱往往苛遣驅一朝麾之去苛刻反在余滿目他人
子誰能不詐虞貧士既失志出入坎壈俱苟非施賴厚
忠信那得符念此我友僕勸誡頻枝梧恐彼成痼習終
焉委泥塗誰能逐山僧惟應秣我車

二十五日去山作

幽居從此去眺聽獨含情風雨一林色春山百鳥聲時

時見芳草忽忽感平生那有吾廬在浮雲到處輕

是日至龍泉庵

復此聽泉坐平臨返照開天盤幽薊色千里一鴉來蘿
壁藏金剌松風滿石臺他宵應夢到池上倚崔嵬

雨

出徑重雲晚當門一鳥歸石林陰漠漠春澗夕霏霏不
見西峯寺疏鐘入夜微新泉應更長流去亦何依

海棠溝

隱寂寺之右石崖秋海棠百年怨風雨一葉不爲芳照
影絕流水相思空斷腸離離蘿薜在向晚鬼煙荒

松

老松屋右偏風水意蕭然巢鶴鳴山月蟠龍走石泉孤
生常閱世抱節不凋天誰解棲雲杪餐苓亦上仙

草

二月春過半草青初欲來寒根自天地羣蟄待風雷莫
遣牛羊踐如迎鴻雁回瀟湘望蘭芷屈宋有餘哀

棗

眼明棗葉紅歲晚逐飄風春至將含蘂吾行又轉蓬榮
枯天地內今古去來中回首青陵柏方知萬物窮

白果

白果雙庭樹枝柯長子孫佛天蔽風雨人代閱金元近
接風篁韻深潛石脈蟠大材世無用自古老山樊

修篁

修篁近白果左右亦雙叢清得乾坤獨寒生雪月同無
心常見節有韻不因風衰鳳歸來晚人閒丹穴空

山椒

歲晏如紅豆枝高倚碧雲誰能識辛苦自惜抱芳芬下
視荃蘭弱高爲松桂羣如何楚臣歎靈后亦無聞

牡丹

眾芳零亂日光豔此花增大德不先物真王多後興榮

哀繫春盡富貴自天能餘事爲紅藥穠華浸苦矜

夜夢至一山有二僧來迎卽居焉云此西山最高處也間舊居隱寂寺曰在此下五十里矣設榻處皆絕壁流泉扶壁始可行開窗上下視但混茫青碧氣不見一物俄大風雨有故人八輩來皆邑中舊游也李君仁本朱君亨嘉亨鳳餘恍惚不能記共云初至隱寂寺覓余知在此復來相就問於何地遇風雨云在山下三十里卽索山僧蔬飯共食之話邑中故舊存亡相與慨然復聞風雨颯然則覺矣枕上口號

貧賤居難定交親見亦疏夜來對風雨天地總空虛已
覺炊無飯猶懽夢有廬存亡古多感出世復何如
絕壁亂飛泉泉聲落枕邊茫茫八方氣浩浩古人天此
境本非幻吾行那得遄一歌茅屋破深感舊游緣

雨不止

枕上聞風雨瀟瀟徹夜聲寺龙號樹暗鑪火近牀明身
世浮雲夢江湖春水生無田可歸隱村曉望農耕

雪

曉望羣峯白因知雨雪紛飄零難擇地變幻不爲雲春
淺寒猶伏天高氣不分萬緣悟消息行矣出山氛

苔

一雨苔新綠千崖石舊蒼
大文見條理生意別陰陽
今古往來迹歲時深淺光
微風啄幽鳥花落亦相忘

鳥

蕭蕭風滿林寂寂古今心
雨雪朝復暮雲山寒更深月
明照石壁日落生層陰
此際絕人語微聞啼鳥音

石

太古亦無物蒼然形氣渾
雕鑱如世變條理自天根
面壁應知道看山共忘言
白雲流水外處處坐黃昏

澗

滄海或孤島重山有複流乾坤幾動靜魚鳥自沈浮
洗高空月陰鳴太古秋君看南北澗萬劫浩然留

雲

人閒望霖雨舒卷自空山萬物滯形迹一天孤往還坐
看風色起或與石林閒際夜多涼月西風掩夕關

月

古人不可見但見古時天夜雪照孤月蕭然萬籟前山
虛如大海樹靜亦千年偶坐崖閒石還聞澗外泉

落葉

無端有飄泊何處不風霜敢以歲時晏而爭天地芳孤

思作子堂詩集卷十七
根應後死明月已先涼悵望江楓外蕭蕭雁數行

雞聲

夜靜氣始動嗶嗶初一鳴有時雜風雨於此感平生落
月故人夢孤燈獨客情明朝出山去誰伴讀書聲

聞羽可四農至口號

悵與名山別欣聞好友來同時先二子老學復高才白
壁原無價黃金舊有臺豈聞售燕石不欲市龍媒騰蹕
當千里酣嬉憶一杯和歌重慷慨看面定低徊江上鼉
鼉窟淮南鴻雁哀且論吳米直孰泛晉舟回雨雪關南
滿車輪河北摧斯民恐寒餓吾輩各塵埃愁眼乾坤闊

虛名歲月催著鞭眞望祖貫庶久思恢兩劍爭輝斗三星或儼能風雲終遇合流浴漫嘲諷大厦思梁棟清時辟草萊致君非讀律遇匠必呈材商羽聲誰和俳優世所推身宜大小得道本古今該喜極言常盡交深意不猜明朝慰離索傾倒潑新醅

二十九日移居蓮花寺漫作

矮屋悠悠七十日何妨此屋暫低頭

余入度鄉試一延試一教習計在棘

開矮屋中

後生大似筍成竹半世空如泥墮溝安得萬

閒開廣厦可知四海信虛舟歸來燕子應相識東幔西

簾總舊游

已丑春居寺之東廡其夏居西廡今亦居西廡而非舊室也

思伯子堂詩集

卷十七

三

王藕唐

碑度

給諫屬題馬士英畫冊

半壁江山事可憐殘縑猶是烈皇年

畫作於崇禎辛未

如何一

碧秦淮月畫出宏光劫後煙

老木寒雲又故城當生惆悵濟南生新詩更與嘲江孔

信史祥符亦有名

此幀爲周櫟園所藏漁洋先生舊題絕句比似南朝諸狎客何如江孔曄

箋時墨迹在焉又云紫京書與蘇黃抗行此老胸中乃亦有邱壑

同時貴筑側權門一死差能報國恩留與他年紅豆老

欲歌朱鳥與招魂

錢受之有題楊龍友畫冊詩幾比之如文信國也

故人一別海天遙尙有黃門解見招

鄭雲麓觀察題七古一首甚佳余識

給事以觀察也

三月落花風色裏滄桑閒與話前朝

星齋爲從弟翰芬

紹曾

寫折枝紅梅索題

杏花春雨又天涯不見江南雪後枝惆悵月明林影下
縞衣風露半酣時

半館紅蕉薄暝天阿兄落筆得春先西陵若對東風晚
詩思清應似水仙

吳門朱西生

緩

孝廉余耳其名久矣今年來都下

一日過余蓮花寺出黛湖漁隱圖屬題因書以歸
之

一亭秋色滄浪水落月金閨夢吾子相逢只含話漁樵
畫裏分明况如此湖湘南望多烽煙白髮元老猶祁連

吾儕坐嘯已壯年投竿秉燭知誰賢黛湖何人今扣舷
眼中樹碧山蒼然想見著書茅屋下出門一笑湖吞天
我亦有廬滄海閒浪游十載歸無田六鼇連釣知何日
見子儻在三神山

松林覓句圖爲羽可題

太音在天地遇之了無端蕭然風過處但見蒼松寒
君誠千古士獨往長林閒清嘯答孤鶴悟後惟碧山

浮青山館圖爲仰山先生題

先生先公嘗任甯遠州刺史禱而生先生寄名
道院師浮青其道號也道光七年先生赴盛京

宗伯之任出山海關州士民皆來迎明年歸皆
走送訪舊道院因繪此圖壬辰夏四月屬題

我聞有宋楊文公前身乃是懷王之仙童又聞文正二
子繼帥慶慶人共思文正功公之好士如大年公之報
國師忠宣來因遺愛徵圖畫何必令人遜古賢天東長
白互遶海寶幢積氣雄千載出關但見萬山青馬前白
髮黎民在同迎公子話使君甘棠舊樹高於雲陪京新
識秩宗貴道院重尋丹鼎芬憶昨持節臨江水更渡鴛
湖過構李碧雞山外邊月高黃河浦口秋風起盡是先
公昔宦遊父老嘆息還歌謳去時遮道來時拜何止殷

勤甯遠州爲感兒時寫縑墨池館依然好峯色翰林原
是謫仙才康樂真能述祖德願公再出爲霖雨廣厦萬
閒容託處方今聖人實神武定知嶽降有申甫忠於君
者孝於父請驗此圖衮能補

陳圓圓畫像

爲宋于庭
孝廉題

宵衣親見烈皇憂儻信將軍解復讎天半蛾眉一輪月
夢中多少故宮秋

陳後出家
入峨嵋

四月十三夜過四農寓廬次日雨中口號奉東

四海相看兩病夫雨風何處問歸途亂雲關塞當簷馬
烽火湖湘照幕烏落拓尊前猶舞劍流離江上幾炊菰

卽聞陽羨田堪買日向又頭數五銖

垂老悲歌憶杜陵若艱一第竟何憑同游或有高書記
知已曾無韋左丞三月落花自今古千年信史感衰興
沈沈街鼓長安夢獨遣羈人臥未能

五月二十九日徐黃二太史招集陶然亭口號

天人古有徵旁皇感獨處苦旱復恆風嗟誰作霖雨登
高散煩憂水雲赫當午回車未肯發四顧共延伫西山
如幽人偃蹇隱巖野鬱蒼百里閒簸揚出焦土千林盡
直立一鳥不高舉側聞

恤刑詔愷悌入肺腑曰維僭與蒙庶司咎可覩誰能排

閨闔引手發雷鼓江湖自波濤悵然望吳楚

贈姚伯山

東之

大令卽送之粵東

君家惜抱翁好學老益純諸孫富文采蔚然時無倫大

令

石甫

驥子怒侍郎

伯昂

閣學龍媒馴看君倏驂駕驂駟追

前塵詞章蓋末藝根本義與仁處爲貞介士出爲經濟

臣類卽千載閒傳者惟一眞學道無所得剽竊皆浮陳

速華實乃墮流俗不足珍昔君始釋褐薄宦漳河濱昨

來聽父老去後謳思頻乃知賢母教爲政非因循以茲

溯風雅若涉知其津新詩一何高逸響宛有神正聲鬱

慷慨古澤涵淵淪太息天下事隱憂如在身今當適百

粵何以貽斯民此邦積豪吏勉持平生貧舊游習風土
庶使澆還淳我生苦局促疲馬困轅輪竊愧私淑意漫
踏龍眠春同時數君子落落星向晨南北常一遇在遠
情則親先人世名德往軌視所遵君七世祖入明史循
國朝名臣至惜抱先生以文章名天下

黃香鐵劍

孝廉有詩在贈賦此奉酬卽題其松下

譚元圖

管樂嗟誰問韓歐孰可知獨餘千古淚悵望九州歧夫
子粵中彥相逢日下遲賤貧非失志慷慨豈鳴詩四海
方多故孤舟何所之不成狎鷗鳥但見長蛟螭憂兆陰

陽外人酣早潦時諫書今寂寞羽檄昔交馳賈誼未匡
漢季梁空在隨傷心雜歌哭避謗有驚疑餘事猶難論
高才肯自卑正聲變繁濫末俗情威儀閒世變憐曠多
年杞卽夷飄飄浣花老蕩蕩後塵悲往者真攀宋斯人
渺莫追當時一書札此日兩心期宋芷灣觀察君鄉先生往歲見余詩有書
與君以知余也句掩羅浮秀羣空燕趙奇異軍方特起儒雅是
吾師頗愧陳同甫來詩烏序陳同甫開世乃相抗長懷韋左司閉門客
久謝來詩近聞學閉門相見喜無恙掃地僕能爲怪爾髮俱索平生同
早衰丹苓儻許就應逐赤松嬉

送艾至堂

暢

孝廉往太原謁方伯邱公卽題其負

好學澤於古憐才意不私自雲望嶽色明月渡河時地
入中原大應看得士奇

聞學傳濂洛程朱道所宗後來溯清洛遺澤在鼇峯士
豈文章貴才應今古同垂簾對玉尺想見昔賢風

家蒲雲明府之官粵東八月十九日送之盧溝橋
同宿逆旅賦詩爲別

若對天南月應思薊北看秋風吹片影夜照宿桑乾近
水知人事平生凜歲寒循良如報績能慰老親懽

贛吉原鄰粵民風近可知百年習歌舞千室幾流離防
海仍通市征蠻正用師誰言多寶玉君自感當時

身世紛多感蒼茫戀此行關河催木葉鼓角動秋城旱
潦需才亟風塵促別輕後時如不忘應見此宵情

寄孔宥函

續錄

上舍

君約十九日就道期宿於盧溝余至而君不來

涼秋多淒風志士多苦心待君出郭門悵望浮雲陰夕
陽忽中野但見青山岑君馬復何之烏鳥紛投林持燈
訪鄰屋僕怨行呻吟誰言桑乾深君去同駸駸晝游長
安陌夜夢黃河潄桑乾與黃河東流悲至今富貴古已
矣坐恐霜盈簪願君勗令德還念哀鴻音

范華原棧道圖爲邱仲嘉

才穎

孝廉題

君不聞秦蜀古來道不通天梯石棧誰爲功煙巒到眼

意超忽茫然萬里游蠶叢千山盤劒外萬水趨巴東不
知去天復幾許但見瀑布噴落飛長虹時來有剗據運
去無英雄還定咸陽啟沛公先主武侯虛閭宮行人指
點興亡恨盡在斜陽閣道中崩崖木葉如花紅子規晝
叫號元熊一重一掩山巒從下出雷雨橫虛空羈心忽
憶烏君夜石室巉巖與此同烏君山在光澤西昔壬午
夏與君師雨農舍人游焉
鳥道崎嶇猿引始可上夜宿會仙巖絕
壁萬仞下臨無地至今猶覺悚然也恨君爾時不往
從嗟余十載猶飄蓬勞歌共客長安市誰寫雲山笠屐
風

春波洗硯圖爲徐星溪

慶超

總戎題

將軍磊落之奇人臂肉可剗孝以真總我嘗割臂以愈祖母病萬里
營歸里人骨意氣豈必平生親起家持戟侍

天子旌旆悠悠建溪溪令嚴白晝肅弓刀時平滄海閒
烽壘將軍談笑無青雲落筆自喜龍蛇紛洗兵不用天
河水下馬真能露布文吾聞端溪之硯冠天下寶此何
須銅雀瓦建溪石數黯澹灘兩地同看碧波瀉將軍愛
硯如愛才豈惟拂拭開塵埃宋公往事吾能說公嘗一
歎三徘徊二百人試明光殿驚飈晝起沙吹面將軍爾
時何殷勤公與將軍始相見宋芷灣觀察嘉慶己未科
服試忽大風起塵沙汚筆
不得書親戎時爲侍衛爲覓湯浣復身爲蔽風埃觀察
卒得館選然總戎與觀察前此未相識故觀察常感之

宋公往矣吾所思因公每憶將軍奇未能長劒並揖客
想見潑墨臨春池仙霞嶺外無重險將軍雄武豪強斂
百越秋風滿大旗落日轅門天澹澹干城長願鎮吾鄉
文采風流異蹶張角巾他日如相訪要看摩崖九曲旁
九月一日同家斗垣機弟游戒壇留宿萬壽寺

千里太行秋蒼然入薊邱興亡閱人代俯仰復神州山
色古今翠河聲日夜流心清到鐘梵身世覺浮漚
際夜松濤作蕭蕭氣滿天多情對洗馬久病欲棲禪鐘
動百禽靜山虛萬籟全西來復何意了悟一燈前

次日偕游潭柘口號

溪迴如不盡縹緲忽聞鐘黃葉下流水白雲生數峰殿
荒換鳩鵲潭古息蛟龍便與阿連約須尋蓮社重

次日偕至翠微山宿龍泉庵

名藍如勝友來往不嫌頻泉動山常靜天秋我自春白
雲娛鳥性紅葉悟花因清嘯松風裏人閒視一塵
入社慙康樂臨風感惠連舊游經歲月高臥俯山川朔
野秋橫塞渾河氣到天正須勞慧遠閒與話桑田
勝覽勞登頓茫然人代嗟遼金無故剎燕薊有驚沙地
古浮雲幻山空落日斜今宵應見月爲照誦楞伽

羅浮仙蝶圖爲黃愛廬樂之考功題

世傳蝶爲鮑姑仙裙所化丙戌二月考功家人
自越東攜繭至都下五月蛹脫考功置酒招客
傳觀旋即飛去時座客武儀潘石生龍溪鄭雲
麓皆有詩皆余故人也雲麓於辛卯冬觀察粵
東而石生於庚寅歲前卒矣壬辰秋九月考功
出圖屬題慨然有作

君不見見羅浮四百峰峰峰秀出青芙蓉編衣游戲不可
見至今但有翠羽啼東風何緣五色蝶宛宛紛相從梅
花月落春山空一時嬌墮仙雲同畫裙尙想留神姥粉
署飛來對寓公當時五月長安陌開軒觴詠延佳客坐

中之客鄭與潘使我披圖感今昔潘公四十騎鯨游豪
氣平生隘九州西華葛練何人問目斷秦關洮水頭鄭
公一官滄海上天南地北勞長望夕陽紅冷珊瑚秋坐
嘯神魚動煙漲風風雨雨常合離身世何似羅浮奇少
陵久客嗟存沒開府平生賸賦詞爲君展畫復三嘆古
來大夢何時旦春駒未必識莊周蒹蘆苦憶歸張翰九
鯉湖邊集雁鴻五羊城外喧鵝鶴朔方俯仰一書生遲
暮關河鄉思亂朝來騎杖化爲龍共汝鐵橋游汗漫

思伯子堂詩集卷十八

建甯張際亮亨甫

壬辰九月出都留別都下交舊

壬辰

仲華拜袞已蹉跎俯仰乾坤一放歌嶺外櫟槍照滄海
江南菱竹盡黃河

至尊獨自勞宵旰倦客空難問笠簑何處五湖足鮭菜
坐愁身世鬢雙皤

謫仙自合老蓬蒿醉後空憐舊錦袍難遣長江變春酒
但看浮世亦秋毫投壺誰識天公笑對簿終輸獄吏豪
擾擾十年卿相夢滄州歸去息風濤

負郭曾無二頃田東南何處繫歸船
波濤瘴癘爭人命去年水荒盜賊流亡自昔年野闊風雲常慘澹江寒鷗鷺與纏綿憐才未必無嚴武杜老傷時自惘然

一身不給憂天下萬里無端在眼中
此去倦游驚歲月古來多難試英雄
閒門長者迴車馬遠道征人逐塞鴻
回首五雲高絕處應知天末有秋風

跌宕虛名二十秋故應天遣徧羈留
霜蓬落日茫茫轉野水寒雲處處浮
未死尙思生出塞得歸莫話昔登樓
東山樵牧知安石折屐風流在白頭

感激今方愧故人卽看僕病轉傷神

高雨農舍人舊僕蔡姓隨其弟子入

都聞余落解爲誰言穎士眞王佐古有靈均是逐臣月
之臥病三日焉迴星稀同自照蘭衰菊萎復何因飄飄但見飢鳥侶飛
盡天涯更海濱

送許薌韭

晚

秀才歸桐城

時丁外艱

國朝數作者大雅推桐鄉方劉旣高蹈惜翁誰頡頏百
川競東注獨立爲隄防至今識星源邈然崑崙長我生
亦已晚不及游門牆嘗讀翁遺書亦訪翁梓桑但逢翁
鄉人話翁不厭詳許君鬱奇抱氣如鶴昂昂說經究終
始遠薄漢與唐夏殷有述作誰言詩缺亡一編訂郊風
欲升夫子堂

近以古邠詩義見示

嗟余復何知愧汝投琳瑯三復

但嘆息後起空前良養病因閉關隔巷徒相望今君忽
南去哀感情可傷人生一聚散落葉隨風揚根本苟不
虧磊砢淩冰霜曠觀天下士自許三代英博雅繼賈鄴
鄙陋嗤歐王百年過逝電熒熄無餘光固知不朽業匪
在聲華場讀君原善篇使我意慨慷庶幾嗣惜翁肯逐
頽波狂嵯峨浮渡山歲晏仍青蒼會當結茅屋醉臥煙
濤旁

鐵耕樓歌爲香鐵孝廉作

吁嗟乎黃君四十艱一第空有百軸文鐵硯豈足以代
耕嗟君終歲攜持勤南經甌海東行汶濟之水濱北來

遇我幽州野落日共看西山雲京華冠蓋自紛紛儒生
顛顚誰見聞醉來拔劍仰天笑我輩合是蓬蒿人君胡
不歸長閉門有樓下瞰蒼溪濱未須元龍臥百尺且學
揚子依一廛欲歸不歸余亦然四海飄泊何所云君不
見杜陵老艱難留滯湖湘道浣花溪上草堂荒回首田
園迹如掃又不見陶徵士頭白歸來愛栗里把酒愛素
心候門憐稚子百年萬事出天定看君已厭彭澤令

勝錄
縣令
不就可

他時種菊藝桑麻待我相逢剪三徑

徐廉峰太史憶壺園圖

圖爲黃左田
宮傳所作

西山碧映如春痕秀色併落君家園夜來山月照高閣

何人爲掃梅花門江東退傳老人洛寫君此意意有存
君才卓犖冠當代餘事作詩溫且敦生平懷抱未一試
獨有意氣空平原憶昨悲歌望四海天高漠漠重雲昏
西來邊色動鷹隼南去惡浪愁鯨鼉飄飄老鳳欲何往
淒淒鳴雁嗟已繁男兒不能奮績圖麒麟猶當短衣長
劒馳塞垣不然跼伏草萊無見聞日醉田家老瓦盆安
能低眉折腰向九陌旦夕俯仰慙乾坤喜君有子已抱
孫有田有宅東湖源願君此後大建言漫憶鱸膾供朝
殮謝公別墅棋堪賭司馬名園德並尊嗟余運數頻阨
屯君實知己况感恩秋風萬里捲一葉杜老何處求東

村臨行執手語鄭重暮夜會見扶桑曦君家洞庭有故
事耆舊文采輝高軒

聖朝若許徵良吏賤子猶能握管論皓首無忘訂車笠
遂園重與繪邱樊

贈別彝生

君與余皆落解先後將南
歸君索詩爲別慨然有作

又到長亭握手時再來相見復何期重思往事添惆悵
漸近中年感別離殘月無端留酒後落花有恨徧天涯
歸帆若過西湖路似水閒愁知未知

余歸道杭州擬游
西湖君將歸侍尊

此甫於

贈別登之

君秋闈薦而不售今將以通判
分發山都索詩爲別慨然有贈

思伯子堂詩集

卷十八

四

譚笑看浮雲富貴復何似公卿與興臺同爲溫飽死誰
能厭卑官差勝作名士出門學候謁入門媚妻子衣食
足自完宮室亦苟美鯢鵬神變化失勢困尺水回首顧
龍蛇紛紛汚泥滓天運苟已然人生何足恃勸君脫儒
巾慷慨取青紫相如未獻賦貲郎豈爲鄙况茲名家兒
貂蟬映珂里聲華冠中外風流在文史壯年出攬轡進
豈限一軌慎毋語澄清良恐招謗毀憶昔屢爲別相見
積悲喜蹉跎共至今此別知遠邇君嘗憐我困我亦速
君仕關河有秋風匹馬吾先駛念君就道時送者人餘
幾京華友朋樂太息斯已矣生存會重逢世事難預擬

但餘耿耿心不斷如流水亦如日與月旦夕時相視交
深言轉淺感激固有以吁嗟天下才坎壈古如此

壬辰閏九月六日出都

壬辰歲秋暮我行去京師驅車出郭門悵望復何之朔
雲翳四野寒日淒無輝風飄霜林葉忽墮游子衣異鄉
雖云樂久客能不歸落葉故無根飄風故無時游子猶
有家何爲泣路歧

黃村

出都三十里逸興曠野通落日照楊柳蕭蕭黃沙風回
首眺宮闕灝氣橫秋空皇天不憫余轍迹頻西東茅茨

見婦子半菽恆不充貧賤我非獨飢渴人所同夜來楊
柳葉霜落爲飛蓬

固安

飲馬渾河流六年徑十度嗟汝青天高歲晚有風露風
露一何涼短鬢日衰素河流自滔滔照人顏非故北望
帝王州蒼然入雲暮我馬獨南行踟躕在中路海燕何
東飛夜鳥何西顧羽翼不相謀何處雙棲樹

雄縣

清霜滿天地獨有楊柳知飄飄黃葉散飛去何天涯有
客歌苦寒歌終聲轉悲借問此何客此客常路歧借問

客何爲平生解詠詩三十艱一第妻子啼寒飢妻子敢
復恤有母亦已衰此客怨黃葉曷不戀故枝託根何厚
薄嚴霜胡汝欺黃葉亦無言對之空淚垂日斜雄縣郭
搖落徧荒坡

趙北口

夜行趙北口風露何蕭蕭七年十二度怨此途路遙路
遙馬骨出客久顏鬢凋搔首問青天皓月不可招車中
見星斗水底相動搖心知光影下夢稔魚龍驕人生亦
如寄何處非良宵誰能抱獨覺物外隨漁樵

二十里舖

終朝感楊柳楊柳爲我秋嫋娜西風中如有不斷愁嗟
汝如佳人遲暮怨蹇修搖落歲方晏百物將誰尤且如
今宵月照我荒村幽月誰與圓缺人誰與樂憂吁嗟百
鍊剛化爲繞指柔大荒有一鳥四海無所投

河間

秋色滿天地蕭蕭車馬來征蓬與落日千里故徘徊望
遠休彈鋏驚寒數舉杯今朝弔毛貫一感說詩才

德州郭外三十里黃河涯是戊子春與煥奎比部
人都留飲處醉後題壁

故人一別各山川酒肆無端在眼前看到海棠紅盡葉

落花飄泊已多年

平原

邑小纔成聚城臨古道空夕陽上楊柳牧馬散兒童
隱衛河色飄飄朔野風鬢絲任吹斷愁在苦吟中

渡濟水

濟水清如此如何伏地流黃河在天上濁浪幾時休
飲馬不能發西風落日秋蒼涼有身世自在羨沙鷗

濟南道中

倚窗秋色自天來千里蒼然返照開莽莽寒蕪孤鳥沒
陰陰野戍亂雲迴難陪北海參高詠卻望長安感下才

愚伯子堂詩集

卷十八

短褐飄蓬如杜二故應望嶽劇低徊

張夏

四山寒抱月一澗夜鳴秋客厭風塵倦心知水石幽茅茨下棲鳥燈火引歸牛樗馬悲嘶急臂征征未敢休

望嶽

岱宗積勢鬱崔嵬輦道何年青壁開封禪祠壇變坏土明禋玉帛亦蒿萊天橫白日滄溟動地敞中原秋色來絕頂誰能一登眺秦皇漢武總堪哀

望嶽

岱宗曾五嶽祀典開皇王恭聞有虞氏玉帛修巡方明

聖德既遠封禪侈漢唐秦人嗟何功刻石摩穹蒼我昔
登日觀矯首望八荒中原積氣盡下視杳茫茫白口出
東海西照河流黃安知嵩華小復有崑崙長神靈應盛
代雨澤崇朝滂如何縱陰霖爾則孤馨香旱潦帝所憂
民困賴降康仰瞻餘嘆息駐馬思明堂

去年十月望夜余在都下西山隱寂寺得福建鄉
試錄時樹齋侍御偕子序明經於是日來觀余留
宿山中相與嘆息今年閏九月望夜余復以落解
出都宿泰安得福建鄉試錄時子序亦落解出居
保定而余與侍御相隔千餘里矣慨然口號寄二

君

東嶽當頭見明月西山過眼卽前塵十年放逐如殘夢
四海升沈感故人可有豹皮留不死更無龍性鬱能馴
平生知己仙屏客差似當年賀季真

曉渡汶水回望泰山有作

天門一輪月送我獨宵征月落平沙曙悠悠汶水情石
林靄蒼翠雲水蕩空明誰看滄溟日朝來絕頂行

羊流

瀕氣滿長空關河盡秋色升高見千里冉冉落日白驚
風捲亂草飄轉如行客沙塵雜人煙霜林閒蒼赤際天

孤鳥外停雲黯無極下山復涉水水深馬沒脊宵征或
失道晝飢不得食三日至羊流僮僕顏面黑岱宗何巖
巖不聞人歎息可憐流離子抱兒泣路側我馬飽芻豆
人兒半黃瘠生命不如物茲理誰能測卻憶羊叔子荆
襄有遺澤墮淚峴山亭志士獨努力窮愁恤一身豈忘
活邦國竊愧細人意咨嗟困行役

磬陽

野曠平沙靜風高老木稀飢鴉爭葉噪流水抱村歸久
客歲時晚荒年人命微無能愧當代有淚獨沾衣

憶翠微山

翠微讀書處幽事共誰論修竹時有雪寒燈深掩門閒
思太虛幻靜見古人存卻遣仍飄泊征車愴夢魂

塚莊

陂陀盤亂石泥潦斷行蹤遠火看村夕嚴寒覺野空天
低馬背上月出鵲聲中草草投荒店勞人信轉蓬

青駝橋遇雨

青駝橋外雨悠悠戊子舊句不見春燕似昔游昨夜秋風吹
片月鄉心流照海雲頭

半城

返照斷飛雨暮禽啼過墻高霞映水紫獨樹表霜黃山

石徑已盡

自張夏至此
日行山石中

村墟寒更荒堪憐小兒女乞食

徧他鄉

二十日至沂州同羽可飲熊東崖太守署中

不見高吟梁甫客再經沂水倦風塵如何叔季需才日
復有英雄竄跡人江上自聞徧鴻雁日邊誰數盡麒麟
卽逢賢守兼詩老懷古傾杯百感新

渡沂水

汶水復沂水滔滔傷我心我行秋更暮霜露滿衣襟野
鶴失高舉山猿惟苦吟因嗟衰鳳德歲晚在丹岑

自沂州至郯城夜宿郭外有述

忠伯子堂詩集卷十八

十

朝從沂水渡夕望鄒子城曠野多悲風鴻雁相哀鳴際
天衰草外惟見飢人行單車挈老弱性命同死生夫推
妻前挽中有兒啼聲夫妻草閒坐撫兒涕淚橫可憐露
下根霜落不再榮時運有往復天道常虧盈嗟汝流離
子昔豈廢織耕汝情天何誅汝困何時亨踟躕我馬悲
昏黑猶前征入門索燈火酒盡餘殘羹主人前致辭今
年稼不成室有凍死骨野有逃荒氓勸客幸無愠得食
無求精我聞意慘惻汝豈知我情我亦苦飢寒奔走去
燕京有母無以養投謁無公卿空歸對妻子抱慙不自
明匹夫被短褐曠懷三代英徧觀天下事忍詠泌與衡

運會不我適凜凜持艱貞寒蟲叫戶牖殘月當檐楹夜
闌耿不寐浩歎良股肱

桃源

宿遷至桃源百里連長堤堤下半飢人穴處蘆葦低往
往蓬首婦抱兒當風啼婦啼兒亦啼不知何慘悽是日
風復雨鴉鵲紛東西側見號乞者長跪當馬蹏問汝誰
氏子汝困誰使之汝實不能言嗚咽我馬悲人生寄一
世萬事那得知昔汝有室家今汝胡流離艱難幸母死
溫飽會有時吾

君至仁聖大吏父母慈善氣所感召旦夕蘇瘡痍吁嗟

慎莫疑

皇天不汝欺

晚發桃源野宿田家

驅車日已暮積潦修塗荒昏黑卽曠野四顧天茫茫我
馬望村嘶稍出夜火光扣門許借宿兒童走在旁中宵
聞書聲攬涕紛旁皇憶我少小時課讀依爺孃見客令
背誦舉語無遺忘父兄顧我喜賓客謂我良焉知二十
載貧賤困他鄉蕭條殞室外木葉零秋霜况我亦有兒
十五如我長我因使廢學此情還內傷咿嚶荒雞啼大
星照繩牀僕夫催人去答問不及詳遠游胡不歸愧汝

田家疃

渡河

歲窮草木落民窮變詐生匹夫不畏死遂使河堤傾河水半入湖決湖歸河行可憐百里閒乃見黃河清我來照衰鬢觸目餘憂驚兩岸泥濘中飢人紛縱橫悲風白晝起但聞號寒聲黠者自玩法困者誰輸誠此水日滔滔滔太息宜歸耕

夜發淮安

殘夢不離水雞聲盡墮風搖船出郡郭聽雨滿秋空萬命泥塗內孤懷歲月中飄飄欲何適處處有哀鴻

唐作子言集以卷十六
阻雨泊寶應城外

撐腸拄腹五千卷險阻艱難十九年

余自甲戌至今秋
作客十九年矣

雨秋風人更老淮南淮北水連天空悲徧野流亡骨未
解孤舟去住緣落木蕭蕭城郭暝竟無燈火但蒼然

至高郵慨然有作

誰將洪澤通黃水遂使淮揚漲白波一綫長堤資轉漕
百年平地欲成河天低極浦人家少雲暗荒城佔船多
濁浪長風吹不盡蒼茫身世恨如何

過召伯驛

白鷗紅樹故依然萬竈消沈息爨煙人與蛟鼉爭窟宅

水浮帆楫入雲天，徒聞禹績存疏導。誰使吳民屢播遷，安得監門圖畫在。吾思謝傅節麾賢。

揚州

汀淮日夜同歸海，倦客扁舟尚此鄉。鹽樵今方待劉晏，才名誰與弔歐陽。嚴風急雨摧瓊樹，野火寒蕪徧蜀岡。多少流離兒女在，宵來城下泣清霜。

是夜十月朔矣，棖觸羈懷，不能自己，再寫一首。一年秋盡，怨無端。况是他鄉酒，又闌人。到揚州，思見月節過重九，已生寒。棲鴉未覺垂楊暝，橫笛能催畫燭殘。愁殺飄零狂杜牧，歲時容易聽歌難。

瓜洲望隔江諸山

龍盤虎踞帝王州自古金陵控上游迴合萬山擁京口
青蒼百里照江流茫茫雲日摩黃鵠渺渺風帆起白鷗
欲訴滄波攬鍾阜悲風殘壘六朝秋

登北固山

東南秋色橫江水千里蒼然滿潤州戰伐已銷京口氣
風煙仍入海門流誰憐晉宋中原盡卻對金焦兩點浮
北顧淒涼空在望三山縹緲欲何求

毘陵贈桐城姚子襄

思贊

文學

牧南青是多賢地好繼先民待汝能千里長江遲桂楫

一年秋盡客蘭陵對牀夜雨聞歸雁

賜君兄同在此

繞郭寒蕪

見野鷹願借長風生羽翼碧天寥闊自飛騰

十月七日游艤舟亭同植之先生穗六上舍

東坡居士自天人兩乞居常亦苦貧偶爾扁舟泊江水
到今吾輩感風塵霜林欲暝孤飛葉晚照初寒遠似塵
北望中山南嶺海一生萬里復何因

十六日毛君生甫別去慨然成詩

淡旬晦凍雨江上遲歸舟及茲對霜月憶汝方中流飢
鴻唳四野貧士何所求風寒葉先脫水闊星孤浮夜天
浩一氣獨知人外幽物運易新故客懷殊樂憂漫懷仲

叔恥儻與元禮游

時君往三河口訪李中者明府

相思竟不寐入夢知

無由

十九日舟發常州夜宿郭外卻寄石甫大令武進

少陵遇孫宰賓石匿趙岐古人重意氣感激豈復辭曰
余困貧賤南北常奔馳恭逢承平日志士嗟何爲短褐
避卿相高論懷軒義舉世厭其狂側足窮所之十年識
夫子到今不我疵慷慨出胸臆扶持濟顛危常念此義
孤身受更不疑憶昨渡江來初三微月時回首見圓缺
眷戀吾行遲郭外風始寒霜露慘已滋悵然宇宙夢獨
覺乃在斯荒林帶迴渚暗鳥驚卑枝夜燈落水次野宿

方無期平生信豪宕來者冀可追良恐死飄泊內愧羞
妻兒自非百世士肯問寒與飢

吳門謁少穆中丞別後卻寄

去年適京師遇公在梁園今年返故里見公復吳門舟
行不舍棹東發不留轍此情何太促蓄意未敢言黃鵠
覽四海飢鳴決雲根仰羨鴛鴦飛恥逐雞鶩喧十月太
湖波暗風吹鼉鼉輕帆挂飄颻雨氣橫天昏吳民苦多
難朽骨連江村夜宿菰蘆中鬼語如煩冤剪燈起太息
悵望憂乾坤邇來東南困十室八九存田廬浸巨浪疫
癘驅殘魂生者委道路死者怨子孫幸逢持節鉞庶使

還飽溫萬命儻再活一夫豈足論終宵愧俯仰倦旅窮
馳奔天運苟有待人事亦已屯回首闔閭墓不見金虎
蹲霸業幸已消憂樂功誰尊

泊吳江

江天煙雨獨歸舟橫笛誰家風滿樓永夜羈人對孤燭
坐聽楓葉下寒流

至烏鎮大雪遂泊舟

天暗雲頭合江寒水氣深一舟風雪夜千里歲時心獨
犬號船火飢鴉警凍林萬方多野宿愧此擁重衾

晚照

晚照開平野寒光動客舟望窮孤鳥沒坐與片雲浮物皆知夕村村不斷流欲隨漁父去來往雪溪頭

新市

往歲蘇州至杭州日夜舟行不絕今年盜賊滋多人夕卽泊矣二十四夜宿此慨然有作

我來涉吳越十月天清寒雨雪積道路久客衣裳單歸心日已速舟行去轉難竊聞盜賊多中夜起長歎此或困苦民無食恣爲患入豈無父兄出豈無長官何以覲苟活暴掠游風湍江湖日夜逝誰能測其瀾孤蓬一夕霜曉畏堅冰團蕭騷老樹下繫纜如荒灘萬事有今昔反覆固無端吾今籲蒼昊溫飽使汝安

塘西

唐伯玉詩集卷一
不見詩人宋大樽爲憐絕調在乾坤斷鴉流水塘西路
風雪誰知昔掩門

不寐

城頭鼓角歛三更江上風船映水明極想魚龍同夢穩
畏聞烏鵲獨飛驚百年內外承平久萬里西南戰伐清
曉發扁舟繫何處乾坤飄泊一儒生

登吳山

天目鬱神秀蜿蜒開錢塘萬家向落日併入湖山光隔
江對禹陵雲氣垂天長疾風卷亂葉不見冬青霜蕭蕭
雁如雨浩浩波連檣客懷竟東逝誰與知興亡古來登

臨勝足使意慨慷矧此歲方晏搖落逢他鄉回首弔夏
后靈駕渺難望許身稷契閒何以濟明良白馬怨鬼雄
朱鳥哀國殤乃悲古烈士受性固不祥飄泊寄短棹紆
迴陟崇岡暫憩翻百憂悵然懷八荒吁嗟化人跡馭氣
游扶桑

遊雲栖至萬村卻回

蕭條錢塘雨倦客淒心魂輕輿訪湖山向夕至此村茅
屋四五家酒壚霜林根水氣上山椒化爲重雲昏天寒
散鳥雀日暗收雞豚風帆逐去雁浦口何飛翻靜觀萬
物態進退若有原紛吾行無定適意聊忘言

二十九日風雨舟發錢塘次日復雨過富陽十一
月朔至日曉霽過桐廬遂入七里灘夜泊釣臺下
次日復霽泝瀨至嚴州卽事成詠

歲窮催短景客久愁長途滄江破凍雨旦暮輕帆孤城
郭帶消雁霧露侵檣烏征魂溼不飛幽夢化爲魚龍蛇
信莫測失勢皆須臾慨想羊裘翁大澤甘樵漁曉色滿
富春清輝照桐廬焉知千載上不似吾來初嗟峨太古
壁積翠浮天無風寒瀑布絕石罅吹煙華峯巒旣阻積
雲雪各慘舒未應陽氣動但悵流年徂夜泊萬籟中蒼
鹿叫山隅傾崖響急澗映火寒潭虛下窺星芒大倒射

峽角巖雙臺互蔽虧勢陞如交扶復感汐社人邱壠亦
已蕪歛歟更達曙旭日迎行艫重嶂轉男崩奔流激崎
嶇中涵碧玉光竹樹清而腴冬深閤夏綠奇采不可摹
扁舟垂綸叟漾影白見鬚空明杳靄閒宛有靈真居吾
生入道路憂樂境每殊連朝百里涉嘯咏已有餘陰陽
自往復今古迅乘除坐觀羣物化乃覺勞形軀霜林蔽
睦州午霽聊攤書

初四日舟發蘭溪連日夜大雪初七至衢州慨然
口號

風雪滿天地孤舟日夜寒飄零來百越兒女憶長安客

思伯子堂詩集卷十八

六

裏音書少愁中歲月寬不堪聽沙雁處處向陽難

馬磯

渙旬六百里水行何速遭霖雨一以霽雪霰橫長川亂
山若萬弩日射孤舟前白氣晝慘澹參錯勢亙天下擁
石瀨高陡瀉蒼濤懸中流對鳥墮欲進同盤旋北風終
夜作積素明沙壩氣寒如受月影絕復見煙推蓬望九
州恨愴一水邊崢嶸太陰精潛光掩龍淵大化亦須臾
順逆無常權今朝乃返風東來送洄沿赤日漏未出蓊
蓊彤雲顛修篁帶橘樹霜翠色始鮮驚湍汭崩騰百轉
嶂阜連入夕至馬磯灘聲疑風泉當頭喜見星坐久月

在肩正恐曉復雪起訝冰留舡舟人竊怪誰此客曾無
眠安知客久倦短夜猶長年吾親亦已衰吾歸苦不遑

常山至玉山

常山至玉山山行不百里苦寒自徒步兩日血流趾可
憐萬山高峨峨雪霜起層冰蓋亂石失足半生死但見
崖谷閒浩白如懸水茅檐晝無煙積淞枯林倚搔首凍
襠纒結衣僵裂指極天來重陰寒勢方未已獨宿太平
櫺靜念無衣子向曉踰屏風關風號亂雲紫飄蕭雨急
漚漚灑到口耳原野正堅凝飢鳥自銜尾羣噪時近人
鳴屋復下視出物畏肅殺人何忽至理舜羽異仁暴興

亡固有以歲晚惜幽芳時艱思烈士青陽一何遲悲歌
白日歎躑躅向城郭入夕隨所止蒼溪照寒月流光在
牀几稍舒筋力困欲歿何門履世路多艱難吾道異張
弛明發放歸舟陸窮水可喜

河口

信州盤蒼溪眾流匯此口憶昔別故人秋風吹中酒昔
行細雨淒今來積雪厚雨雪天地閒孤舟愴奔走東南
互寒氣黯然界牛斗驚飆卷落日亂鴉噪枯柳市樓千
柱高背波燦窗牖細人自憧憧富庶承平久歲晚計羸
絀出入媚子婦貧士獨何營五窮愧相守乃知范大夫

英雄固非偶，隔水見九獅。
磊砢如昂首，邇來居負販。
鑿石相先後，山川邁幽辱。
人事復何有，但思返田園。
招隱待良友。

青山灣

落日散奇采，夕光明西南。
乘流信輕風，翠石包迴潭。
寒鳥各自飛，影滅餘煙嵐。
依依帆際月，皎皎波中涵。
疏鐘動絕壁，幽夢懷茅庵。

弋陽

丁亥夏與伯兄同歸過此

依然水碧映蒼山，六載重來是獨還。
江雁不知行客恨，數聲飛過夕陽閒。

東川

出資溪創迷失道徑亂山中至此才三十里耳

出門有歧途宜灑楊朱淚亂山積雪高一鳥下寒翠腹
飢望煙火暝色茅檐至孤燈照深屋父老話荒歲北風
夜聞雞獨坐月在地靜念平生游愴然如夢寐

漁塘渡口

在上清司下流二十里石峯故奇峭

水來上清幽山闕上清曲一片懸孤雲千重削蒼玉空
明互照影礧礧自成族石氣晝浮天安能辨崖谷煙蓬
如蒼茫日夕見寒綠吾欲訪靈真丹嶂結茅屋

對橋

棕桐修竹映山青店倚楓根似破亭一夜雪消疑作雨

北風吹向月中聽

五里店

屬金谿

濛濛寒氣隔山城野店風寒夢不成牀上桔槔牀下犬
破扉殘月照分明

清江

清江似楊林悠然憶親故殘照滿蒼山孤煙上紅樹天
寒夕流急閒鷗睇人渡

后車

溪迴眾山深窈然見蒼翠松色照寒塘夕鳥鳴幽寺征
人獨不眠殘月在簷際

建昌

天迴北風寒鄉心入月殘不知滄海上烽火幾家看江
雁飢仍急城烏凍未安萬方霜露滿何止客衣單

石亭

在南豐東北十五里未至縣也

朝晴夕雨霰天道誰能知數家成聚落煙火柴門欹主
人意何勤拙野多言辭娶婦始三日客舍陋未治酒薄
且盡醉風寒年歲飢坐久導入室土墻懸蛛絲小戶正
面竈夜昏時見炊馴犬走我旁遶牀復嗅衣黠鼠伺我
側乍去旋來窺中宵聽母友艱難話所私雞鳴起操作
愧我方無爲况聞夏秋交癘疫成瘡痍苦旱害晚稼食

糠固不肥誰能罪真宰蒿目空嗟咨

三樂嶺

南豐縣至此三十里

午行發南豐向夕至此嶺天寒茅屋閉夜深燈火靜空
山落微雪殘月在松頂蕭然生道心天地一塵影

百丈嶺

嵯峨萬山高積雪何茫然疾風卷飛瀑下注百丈淵中
通一鳥道亂石層冰堅白氣浩凜冽陰崖紛盤旋側目
不敢顧凍獸斃我前如何負販子重足猶攀緣年荒婦
子餓忍死肯息肩搔首爲太息轉側僕已顛強起向山
家晝閉門無煙

思伯子堂詩集

卷十八

三

蕭家灣

同產十六人一兄二姊存遠客飢寒歸見姊如家門雪中得湯暖僮僕向火溫細話家人事勸我毋憂煩阿甥索母抱掩面餘啼痕明燈照土屋凍樹欲離根今年穫稻少歎息酒亦渾骨肉幸無恙那復計盤飧坐久雞亂叫睡覺忘朝暾

到家

仲冬月既望我行始到家兒歸母復病仰天惟嘆嗟子弟漸長大懶不勤桑麻悄然獨內傷吾生亦有涯母言見兒歸卽死意已瘥涕淚告阿母反哺不如鴉可憐屋

上鳥正啼寒風斜阿母促就寢雞鳴簷霜華家雞久不
聞聞雞憶駕車慨想負米士安得棲煙霞